

# Promil-taxi er per seniors?

Alvagni/envia: Discussiun agl podi «neir vigl an Val Alvra»

■ (pb) La tgesa d'attempos envia ad Alvagni festivescha chest onn igl giubileum da 5 onns. Igl manader da chella, Roland Weber, è fitg activ. Durant igl onn ò el organisò diversas seiradas. L'amprema è stada l'emda passada. Ena discussiun cun igl tema «neir vigl an Val Alvra». Roland Weber para da tutgier igl interess dalla gliout cun las sias occurrenzas durant igl onn da giubileum. Betg manc da 70 persungas èn rivadas gievgia seira passada agl envia. Alla discussiun agl podi eran anvidadas las suandontas persungas: Caspar Nicca, igl magnafatschenta dalla corporaziun Regio Viamala scu magnadiscussiun; Peter Keller, igl medic dad Alvagni; Annemilia Hemmi, intermediatoura Spitex Alvral Churwalda da Churwalda; Gerda Previtali digl post da consegliaziun Tusang dalla Pro Senectute; Erika Hanselmann, presidenta circuitala, circuit Barvogn da Filisour; Christian Goldmann, cassier gruppa da seniors Alvra; Heinrich Balzer, manader gruppa da seniors Alvra e Ro-

land Weber, manader tgesa d'attempos envia, Alvagni.

## Vigliadetna è fitg individuala

Ainten en'amprema part dalla discussiun, adegna er integrond igl publicum, ins ò tschartgea dad inventarisar tge tgi dat ainten la Val Alvra ansomma per igls seniors. Ègl ansomma bel da neir vigl an Val Alvra cun las pussebladads tg'ins ò? Cò è sa resulto, tgi dat atgnamaintg dètg bleras purescheidas er per igls seniors. Eneda è chegl la gruppa da seniors Alvra cun fitg bleras activitads durant igl antier onn e fitg fermas frequenzas. Siva èn chegl las uniuns da donnas localas tgi fon adegna puspe er ensatge per igls seniors. I dat gruppas da gimnastica per attempos, i dat sivamezdeis da gis, i dat giantars communabels, i dat scuntradas regularas da seniors aint igl envia. Ainten las singulas vischnancas dattigl magari gruppas libras da seniors scu p. ex. a Barvogn «vigliadetna activa» u a Farrera ena gruppa tgi dat a tschoccas. Ed alloura fitg impurtants èn igls sarvetschs dalla spi-

tex per tgi attempos possan star pi dei a tgesa. Er grond sustign gist an dumondas da consegliaziun finanziaria e dumondas da dretg on igls seniors da la Pro Senectute. I dat er igl sarvetsch da taxi dalla crousch cotschna, chegl principalmaintg per visetas tigl medic, daintist, ortoped etc. A madem mument scu tg'ins ò inventariso las pussebladads per igls seniors ins ò er constatato, tgi vigliadetna è ensatge fitg individual. Egn sa sainta gio cun 60 vigl e l'oter è anc cun 90 fitg activ. Uscheia èn er ls preteisas anvers la generalitad fitg differentas. Ed ena persunga sanga ò er tot otras preteisas tgi ena persunga cun en impedimaint. E la mobilitad dad en cartgung attempo è er fitg decisiva.

## Visitar er a tgesa

En tema tgi ò er influenzo la discussiun è igl contact general tranter igls seniors. Egn or digl mez era sursto tgi el dumonda adegna agl persunal dalla spitex scu tgi geia agl sies cumarat, tgi vigna er visito dalla spitex. El survigna adegna la rasposta tgi

ins dastga betg deir, ord muteivs digl schurmetg da datas. E chegl è er uscheia, ensatge sumigliant alla secrettezza digls medis. Ins ò alloura fatg ena constataziun generala, tgi igls attempos tranter els visetan relativamaintg rar l'egna l'oter. Ins vot betg disturbar la sfera privata. Pi spert tgi ensatge è alloura ainten spital u ainten la tgesa d'attempos, alloura ins viseta. Lò para igl senior dad aver en statuts «uffizial» scu paziaint u attempo ed alloura è ena vesta quasi legitimada. An general è sto la tenuta digls seniors tgi ins duess tgirar igls contacts tranter igls seniors dalla Val ed eir ordavant cugl bung exaimpel, gist schi an otras tgossas ins vegia fadeia da collaborar. E da tottas varts è nia menziuno, tgi ins duess mantgantar navot per impedeir l'isolaziun dad ensatge, er preventiv, pero adegna cun risguardar igl giaveisch dad aver pi bler u pi pac contact.

## Giaveischs dattigl er

An la davosa part dalla discussiun è alloura pitost nia formulò giaveischs. Giaveischs

tgi mossan tgi i dat er anc pussebladads da migliurar la situaziun per «neir vigl an Val Alvra». Giaveischs tgi saron per part realisabels e per part betg. Per exaimpel chel tgi dess er tgesas cun abitaziuns communablas per seniors u otras furmas dad abitar communablas. Cò ins vei pero dalla politica annò gronds problems per la finanziaziun da tals projects. Betg cuntaint ins è an general er cun la mobilitad da chels tgi von betg ple sezs cun auto. Igl med da traffic publics èn betg sufficiants, zont la seira betg. Schi ensatge vot eir la seira ad ensanouas ad en concert u ad en teater, ins vegia siva betg la pussebladad da turnar a tgesa. I detta er nignas pussebladads da taxi. Gl'è nia fatg attent tgi detta ossa chest onn per l'amprema geda er an Val Alvra en promil-taxi an Val Alvra. Chel seia staziuno a Barvogn e geia igl venderde e la sonda dallas 17.30 anfignen las 03.00 per 5 fr/persunga anfignen Casti e suror anfignen Savognin e Lai per 15 fr. Chel seia betg cò angal per igls giovens, mabagn er per igls seniors.